

顏魯公全傳

黃本驥 編
蔣環 校

上海仿古書店發行

案顏魯公畫像宋中興館閣書畫錄有顏魯公像一米芾畫史有唐人畫張志和顏魯公撫背圖又恭讀
大清會典

南薰殿尊藏歷代名臣像有顏真卿像一今皆未見惟宋靖康元年知同州軍州事唐重刻公像於奉使帖之下
方跋云重旣摹公之像於蒲繪而祠之又訪得此石本狀貌老矣今蒲州之像不傳惟此石尙在同州府學
茲據同州刻本縮臨本驥識

欽定四庫全書總目提要

顏魯公集十五卷補遺一卷年譜一卷附錄一卷唐顏真卿撰真卿事蹟具唐書本傳其集見於藝文志者有吳興集十卷又廬州集十卷臨川集十卷至北宋皆亡有吳興沈氏者採掇遺佚編爲十五卷劉敞爲之序但稱沈侯而不著名字嘉祐中又有宋敏求編本亦十五卷見館閣書目江休復嘉祐雜志極稱其採錄之博至南宋時又多漫漶不完嘉定間留元剛守永嘉得敏求殘本十二卷失其三卷乃以所見真卿文別爲補遺併撰次年譜附之自爲後序後人復卽元剛之本分爲十五卷以符沈宋二本之原數沿及明代留本亦不甚傳今世所行乃萬歷中眞卿裔孫允祚所刊脫漏舛錯盡失其舊獨此本爲錫山安國所刻雖已分十五卷然猶元剛原本也眞卿大節炳著史冊而文章典博莊重亦稱其爲人集中廟享議等篇說禮尤爲精粹特收拾於散佚之餘卽元剛所編亦不免闕略今考其遺文之見於石刻者往往爲元剛所未收謹詳加搜輯得殷府君夫人顏氏碑銘一首尉遲過廟碑銘一首太尉宋文貞公神道碑側記一首贈祕書少監顏君廟碑碑側記碑額陰記各一首竹山連句詩一首奉使蔡州詩一首皆有碑帖現存又政和公主碑殘文顏元孫墓誌殘文二篇見江氏筆錄陶公栗里詩見困學紀聞今俱採出增入補遺卷內至留元剛所錄祕書序其文旣與廟享議複見而篇末時議者舉然云云乃新唐書陳京傳敘事之詞亦非眞卿本文又干祿字書序乃顏元孫作眞卿特書之刻石元剛遂以爲眞卿文亦爲舛誤今並從刊削焉後附年譜一卷舊亦題元剛作而譜中所列詩文諸目多集中所無疑亦元剛因舊本增輯也元剛字茂潛丞相留正之子官終起居舍人

欽定四庫全書簡明目錄

顏魯公集十五卷補遺一卷附錄一卷唐顏真卿撰原本久佚此本乃宋敏求掇拾重編得十五卷至南宋又佚其三卷留元剛爲蒐緝補完併訂正年譜附於末然真卿詩文見於石刻者尙有尉遲迴碑等八篇見於說部者尙有政和公主碑等三篇則亦未爲賅備今併續採補入俾無更散遺焉

按唐書藝文志顏真卿有廬集十卷行狀作廬陵集提要誤作廬州集又云殷府君顏氏碑銘尉遲迴廟碑銘二首增入補遺卷今檢武英殿聚珍版文忠集內無此二碑又政和公主碑顏元孫墓誌殘文二首提要云據江氏筆錄探出今檢全唐文顏集內殷夫人顏氏尉遲迴和政公主顏元孫四碑皆有全文而和政公主提要誤作政和顏元孫神道碑提要誤作墓誌提要又云附年譜一卷今檢聚珍版文忠集無此卷又案聚珍版文忠集以全唐詩校之少水亭詠風溪館聽蟬二聯句詩以全唐文校之少象魏賦請除禪服奏請除素練聽政奏駁韋陟諡忠孝議對三命判按楊志堅妻求別適判劉中使帖世系譜序送高寬仁序汎愛寺重修記湖州碑陰記橫山廟記項王碑陰述永字八法頌顏勤禮元孫允南幼輿允臧臯卿和政公主殷夫人顏君等八碑陸務滋贊蒲塘辨尉遲迴碑銘顏含大宗碑共二十有六首其見於史傳說部及石刻者新唐書禮樂志有請定武成廟釋奠奏杜佑通典有元陵儀注及更定昏禮奏宋刻汝帖有一行帖留元剛忠義堂帖有朝迴帖硤州帖捧袂帖乞米帖廬八倉曹帖鞏嶠忠義堂續帖有南來草篆江外送書四帖董其昌戲鴻堂帖有謝鹿脯奉辭近聞三帖合而計之又得十有八首今得補編入集

顏魯公年譜

宋留氏元剛撰魯公年譜附集以傳敘次簡明微嫌太略今博稽史傳詳採遺文按歲重編用便尋檢仍以留譜編入外集爲尙論噉矢云本驥議

中宗景龍三年己酉公生（據舊唐書本傳公卒於興元元年年七十七歲推其生當在景龍二年新唐書本傳作七十六歲則其生當在是年然公有移蔡一帖作於貞元元年正月十九日則公卒實非興元元年矣今從新書德宗紀作貞元元年八月丙戌卒推至是年爲七十七歲是爲生公之年）公名眞卿字清臣其先琅邪臨沂人五世祖之推於後周時始家關中遂爲京兆萬年人（舊書本傳作萬人杲卿傳作長安人萬年年長安皆京縣萬年今咸寧也）顏之得姓一謂魯公伯禽支庶食采於顏因而著族是爲姬姓之裔一謂邾武公夷甫字顏字孫遂以爲氏是謂曹姓之裔公從祖師古注急就篇主前說公撰太宗（爲公十三世祖舍作）家廟（爲公父惟貞作）二碑皆主後說（後說本於圈稱陳留風俗傳葛洪要字二家以左傳襄公二十九年齊侯娶於魯曰顏懿姬之文證之則顏實姬姓非曹姓以師古之注爲確）顏氏世爲魯之卿大夫孔門達者七十二人顏氏有八曰無繇曰無繇子回居德行之首爲亞聖曰辛曰之僕（大宗碑作僕）曰噲曰何曰高（家語作產今本家語作刻大宗碑作驕今從史記）曰祖（家語作相此從史記）又有濁鄒（左傳作庚呂覽作濁聚此從史記）丁闔叔子皆不在仲尼弟子之列戰國有率蠋（蠋見戰國策春秋後語作觸大宗碑作觸家廟碑作燭金石萃編誤以率燭爲一人故云未見有所謂率燭者）秦有芝貞漢有異肆安樂（安樂見後漢書儒林傳）魏有斐盛（斐附見三國志倉慈傳）盛爲青徐二州刺史關內侯始自

魯居於臨沂孝悌里是爲始遷琅邪之祖（顏氏唐無宰相世系表不著於新書今據大宗家廟等碑自威以下詳其所生）威生大中大夫廣陵太守給事中葛繹貞子欽欽生汝陰太守護軍襲葛繹子默默生晉侍中右光祿大夫本州大中正西平靖侯含（晉書有傳祖欽父默附見）含隨元帝渡江居上元生侍中光祿勳西平定侯髦（附見含傳）髦生州西曹騎都尉西平侯繇繇生宣城太守御史中丞靖之靖之生巴陵太守度支校尉騰之騰之生輔國江夏王參軍炳之炳之生齊治書侍御史（治書家廟碑作持書辟高宗諱改）兼中丞見遠自含至此皆居上元見遠生梁鎮西記室參軍協（梁書有傳父見遠附見）協三子長之儀北周御正御史大夫麟趾學士集州刺史新野公（周書有傳）次之推北齊給事黃門侍郎待詔文林館平原太守隋東宮學士（齊書有傳）次之善隋葉令之推爲始遷京兆之祖三子長思魯隋司經校書東宮學士唐秦王記室次愍楚（新書藝文志作敏楚）侍御史次遊秦唐廉郾二州刺史臨沂男思魯四子長師古祕監宏文館學士琳邪子戴公（新舊書皆有傳從父遊秦附見新書公傳謂公爲師古五世從孫師古與公會祖勤禮爲親兄弟則公乃師古之從會孫傳作五世從孫誤）次相時秦王府崇賢學士諫議大夫禮部侍郎（附見兄師古傳）次勤禮校書著作藝府長史贈號州刺史次育德太子通事舍人司經局校定勤禮七子長昭甫（初名顯甫避中宗諱改名舊書杲卿傳作祖甫史官劉昫避高祖諱始嫌名去昭字）高宗侍讀曹王屬贈華州刺史次敬仲吏部郎中平昌男（新舊書附見殷踐猷傳）次慈照無官少連務滋辟強（昭甫敬仲乃勤禮元配殷氏出殆庶等五子乃繼配柳氏出柳爲中書令襲之慈照以高祖廢后外祖坐與褚遂良朋黨被戮勤禮以爽累貶夔州長史而殆庶等亦以爽之甥不得任進至昭甫三子長元孫滌沂豪三州刺史贈祕書監次惟貞薛王友柱國累贈祕書少監國子祭酒太子少保元孫五子長春卿偃師丞次杲卿太常丞攝常山太守拜衛尉卿贈太子太保諡忠節（新書杲卿傳云與吳郡同五

世祖案臬卿與公同祖五世字衍。次曜卿直崇文館溜川司馬次旭卿允山令次茂會犍爲司馬惟貞七子長闕疑杭州參軍次允南殿中侍御史膳部司封郎中金鄉男次喬卿富平尉次眞長舉明經次幼輿左清道兵曹次卽魯公也次允臧荆南行軍司馬（大宗家廟二碑皆載元孫五子惟貞七子公於同父兄弟其次當在第六於從父兄弟其次當在第十一公書家廟碑自稱第七男書干祿字書及殷夫人顏君碑皆自稱第十三姪蓋元孫六子惟貞八子各歿其一爲廟碑所未及又公作兄允南神道碑云惟貞府君之第二子作兄幼輿神道碑云惟貞府君之第六子則公兄之歿者當在允南之下幼輿之上矣又公撰殷踐猷墓碣云長妹蘭陵郡太夫人眞卿之先妣也中年孀嫠遺孤十人未能自振則公之同懷尙有兄若姊妹三人不止七人也故公撰勤禮碑云曾孫之無祿早世者尙有長卿晉卿郊充國贊五人雖不能別其孰爲公之親兄弟而公兄弟之早世者亦在其中矣）

四年庚戌二歲六月殤帝唐隆元年七月睿宗景雲元年睿宗第五子彭城王隆業進封薛王父惟貞爲之友（唐六典親王府置友一人從四品下）是年公弟允臧生

景雲二年辛亥三歲公父惟貞以景雲二年正月爲蕭思亮撰墓誌銘其時尙在則公之孤當在二年正月以後三年壬子四歲正月睿宗太極元年五月延和元年八月明皇先天元年

先天二年癸丑五歲二月伯父元孫除滁州刺史廣德二年公爲追書其告十一月明皇開元元年

開元六年戊午十歲舊書傳云事親以孝聞新書傳云少孤母殷氏躬加訓導（殷氏新書作商氏史臣避宋太祖父諱宏殷故改殷爲商今更正案公高祖思魯娶於殷氏家廟碑額陰記所謂高祖妣殷夫人也曾祖勤禮亦娶於殷氏公撰勤禮神道碑所謂娶御正中大夫殷英童女也祖昭甫又娶於殷氏家廟碑云昭甫工篆籀草隸與內弟殷仲容齊名昭甫之妻仲容之姊也父惟貞又娶於殷氏公撰殷踐猷墓碣云長妹蘭陵

郡太夫人眞卿先妣也公母爲英童之元孫太常博士子敬之女也長兄闕疑第六兄幼輿皆娶於殷氏闕疑娶殷履直之女公撰殷夫人顏君碑云六女幼適我兄闕疑幼輿娶踐猷之女公撰幼輿神道碑云夫人陳郡殷氏也公自高祖以來凡五世六人娶於殷氏公撰家廟碑云眞卿早孤公父惟貞之卒家廟碑僅云御史大夫張知泰妻魯郡夫人亡之秋七月未詳其年伯父元孫兄允南親自教誨又撰允南神道碑云家有折脛鶴眞卿小時戲書其背君切責曰此雖不能奮飛竟不惜其羽毛奚不仁之甚眞卿終身志之不敢忘

九年辛酉十三歲公隨母外祖殷子敬於吳縣令任子敬爲吳令見公撰舅氏踐猷墓碣公有刻虎邱清遠道士詩云不到東西寺於今五十春爲大歷六年至吳郡作逆推而上五十年故知是歲隨母來此七月踐猷卒於京師廣德二年公撰墓碣云長妹蘭陵郡太君眞卿先妣也中年孀嫠遺孤十人未能自振君悉心訓獎皆究恩意故能長而有立

十六年戊辰二十歲舊書傳云少勤學業有詞藻尤工書新書傳云旣長遂博學工詞章

二十年壬申二十四歲七月伯父孫卒其子春卿翼城縣丞之任

二十一年癸酉二十五歲讀書於長安福山寺

二十二年甲戌二十六歲公以對三命判與馬兢同擢拔萃科舉進士第試梓材賦庫詩登甲科是年掌貢士選者爲考功員外郎孫逖舊書逖傳云所選多俊才杜鴻漸至宰輔顏眞卿爲尚書公序逖文集云公雅有清鑒典考功時精覈進士所獎擢者二十七人數年間宏詞判入甲第者十有六人授校書郎者九人其餘咸著名當世公娶京兆韋氏房州刺史景駿之孫太子中舍迪之女也

二十四年丙子二十八歲吏部擢判入高等授朝散郎（唐會要朝散郎從七品）祕書省著作局校書郎

二十五年丁丑年二十九歲正月至相州撰周太師尉遲迴銘（碑爲閻伯璵撰敘蔡有鄰書在河南彰德府）七月至東都同祖姑錢塘丞殷履直妻卒公童孺時殷夫人嘗教以王孫五都等賦飛龍造化等篇後刺湖州時爲撰書墓碣

二十六年戊寅三十歲是年母殷夫人卒權厝於東都

二十九年辛巳三十三歲在東都從父兄偃師丞春卿卒新書春卿傳云臨終提眞卿臂曰爾當大吾族顧我不得見以諸子誘汝後眞卿主其婚嫁

天寶元年壬午三十四歲是年歸京兆秋扶風郡太守崔琇舉公博學文詞秀逸科元宗御勤政樓策試上第十月授醴泉尉公過瑤臺寺懷圓寂上人詩序云眞卿以天寶元年尉醴泉公與陳郡殷寅（公舅踐猷之子）河東柳芳南陸據蘭陵蕭穎士趙郡李華汝南邵軫鄧州趙曄同志友善故天寶中語曰殷顏柳陸蕭李邵趙以其重行誼敦交道也

二年癸未三十五歲罷醴泉尉事詣洛陽訪吳郡張旭於裴微宅請授草書筆法新書旭傳云善草書傳其法者惟崔邈顏眞卿而已公自書帖云自南朝來上祖多以草隸篆籀爲當代所稱及至小子斯道大喪但曾見張旭長史頗示少糟粕恨無分遂不能佳耳又作懷素草書歌序云吳郡張旭長史雖姿性顛逸超絕古今而楷法精詳特爲眞正卿早歲嘗接遊居屢蒙激勸告以筆法資質劣弱又嬰物務不能懇習迄用無成追思一言何可復得

五載丙戌三十八歲前在醴泉以清白聞爲關內道黜陟使王鉷所荐授通直郎（唐會要通直郎從七品）陟長安尋罷尉事再至洛陽寓裴微宅月餘作張長史十二意筆法記仍歸長安

六載丁亥三十九歲四命爲監察御史充河東朔方軍試覆屯交兵使以陳郡殷克齊爲判官（克齊踐猷長子

攝之第三子）十月歸自河東立父惟貞墓碑（陸據撰文蔡有鄰八分書）

七載戊子四十歲八月充河西隴右軍試覆屯交兵使河南岑參作胡笳歌送之五原有冤獄久不決公至立辨之天方旱獄決乃雨郡人呼之爲御史雨時范陽魯炁爲隴右節度哥舒翰別奏公至隴右翰宴之公謂翰曰中丞自即將授將軍便登節制後生可畏爲無人乎時炁立在階下翰指炁曰此人後當爲節度使矣是載公長子頗生

八載己丑四十一歲自河隴歸再充河東朔方軍試覆屯交兵使河東人鄭延祚母卒二十三年殯僧舍垣地眞卿劾奏之兄弟三十年不齒天下聳動八月自河朔歸還殿中侍御史宋璟第四子渾爲中丞御史吉溫以私怨搆渾謫賀州公曰奈何以一時忿欲危宋璟後乎尋爲宰相楊國忠所忌諷中丞蔣列奏爲東都畿（以唐洛陽爲東都）採訪使判官

九載庚寅四十二歲七月兄幼輿卒於長安八月再轉殿中侍御史公撰兄允南神道碑云元宗嘗撰華嶽碑並書天寶九載令御史大夫王鉞作百本以賜朝臣家獲二本者四族而君以兩省官（允南時爲左補闕）弟眞卿以殿中侍御史居其一焉每正至朝賀宰相以下登殿者不過三十人而君與眞卿法服於含元殿舞蹈而衣袂接焉（大宗家廟二碑皆載此事云舞蹈而衣袂相接者三）朝覲宴集必同行列故兄賦詩云誰言百人會兄弟也露陪

十載辛卯四十三歲公弟允臧以制舉縣令對策及第授延昌令

十一載壬辰年四十四歲遷武部員外郎（是年正月改兵部爲武部）判南曹書南陽岑勛撰多寶塔感應碑公書之傳於今者以此碑爲始自書銜云判尚書武部員外郎金石萃編云是時公爲東都探訪判官此碑（嘗云判探訪何以云判尚書不知公爲國忠所忌出爲探訪判官此外官也由侍御史再轉而爲武部員外

郎則入爲朝官矣安得復判採訪其曰判尙書者員外郎掌武官選舉總判武部尙書所掌事耳舊書武部員外郎上有轉侍御史四字新書以再轉二字易之故萃編冒上採訪判官讀之因而致誤書駕部郎中程浩撰夫人廟堂碑（今存殘本七十一字爲華州王氏所藏其全文見元至正元年太平路總管賈度重摹本多寶塔碑及是碑皆建於四月二十二日戊戌是載四月爲丁丑朔故二十二日爲戊戌二碑皆誤書作乙丑）書自撰工部尙書郭虛己碑河南府參軍郭揆碑

十二載癸巳四十五歲六月詔補尙書十數人爲郡守宰相楊國忠怒公不附己謬稱精擇以公出守平原郡元宗宴公等於蓬萊前殿賦詩贈帛以寵其行河南岑參作詩送之時河東節度安祿山逆節頗著公至平原以霖雨爲託修城浚池陰料丁壯儲慶實乃陽會文士泛舟外池飲酒賦詩或譏於祿山祿山亦密偵之以書生不足慮也公自典校時卽考五世祖之推與陸法言所定切韻引說文蒼雅諸書窮其訓解次以經史子集中兩字以上成句者廣而編之以其鏡照原本無所不見名曰韻海鏡源至是與郡人勃海封紹高箕族弟渾等修之成二百卷屬祿山作亂止其四分之一九月魯山令元德秀卒公書其墓碑後人爭摸寫之與李華撰文李陽冰篆額及德秀人品爲四絕（趙氏金石錄謂是碑爲建中四年秋書其時公已爲李希烈所困安得爲德秀書碑據李華撰德秀碑云德秀卒於天寶十二載九月則魯公書碑當在是載之後）

十三載甲午四十六歲在平原二月書晉夏侯湛撰漢太中大夫東方朔像贊并書自撰碑陰記（碑在今陵縣署）

十四載乙未四十七歲在平原（公之爲平原在天寶十二載留譜於十四載下又云轉兵部員外郎公旣以武部員外郎出爲平原不得於此再轉兵部且兵部卽武部也留譜誤）十一月安祿山舉范陽兵反河朔盡陷獨平原城守具備乃使司兵參軍李平馳奏之元宗初聞祿山之變曰河北二十四郡豈無一忠臣乎得

平至大喜顧左右曰朕不識顏真卿形狀何如所爲乃若此祿山初尙移牒至公令以博平軍屯七千人防河津以博平太守張獻直爲副公乃募勇士旬日得萬人遣錄士參軍李擇交統之簡閱以刁萬歲和琳徐皓馬相如高抗朗等爲將河間司法李奐殺祿山所署長史王懷忠濟南太守李隨殺祿山所署博平太守馬冀饒陽太守盧全誠景城司馬李暉鄆郡太守王燾各以衆歸有詔北海太守賀蘭進明率精銳五千濟河爲助十二月十二日祿山陷洛陽殺東郡留守李憺中丞盧奕判官蔣清以三首遣段子光來徇河北公恐搖人心乃詐謂諸將曰我識此三人首皆非也遂腰斬子光密藏三首異日乃取三首冠飾草纒支體棺殮祭殯爲位痛哭人心益附祿山遣其將李欽湊高逸何千年守土門公遣錫盧逖至常山告郡守從父兄杲卿相與起義兵犄角斷賊歸路以紓西寇之勢杲卿乃與長史袁履謙謀殺欽湊擒逸千年送京師土門旣開清池尉賈載鹽山尉穆寧共斬僞署景城守劉道元傳首平原公召載寧及清河尉張澹詣平原計事十七郡同日歸順共推公爲帥得兵二十餘萬橫絕燕趙軍威大振其附祿山者惟范陽盧龍密雲漁陽汲鄆六郡而已祿山方自率衆而西至陝號聞河北有變而還

十五載丙申四十八歲正月八日賊將史思明陷常山杲卿死之於是鄆廣平鉅鹿趙郡上谷博陵文安魏都信都復爲賊守公乃以李暉自副而用李銑賈載沈震爲判官乙巳以充本郡防禦使守城功詔加戶部侍郎依前平原太守三月加河北招討採訪使清河客李粦年二十餘與郡人來乞師謂公曰聞公義烈首唱大順河朔諸郡恃公爲長城今清河實公之西鄰也僕幸寓家得其虛實知可爲長者用今計其蓄積足以三平原之富士卒可以二平原之強公因而撫之腹心輔車之郡其他小城運之如臂使指耳唯公所意誰敢不從公曰吾兵新集未練何暇及鄰然子之請兵欲何爲乎粦曰清河非力不足而借公之師也亦以觀大賢之名義耳今仰瞻高意未有決辭定色僕何敢遽言所爲公奇之欲與之兵衆以粦爲年少輕慮必無所

成公不得已辭之。粵就館復爲書說公曰：「清河去逆效順，奉粟帛器械以資軍公，乃不納而疑之。僕回轅之後，清河不能孤立，必有所繫託。將爲公西面之強敵，公能無悔乎？公大驚，遽詣其館，以兵六千人借之。」（舊書作一千從新書）粵將去，公謂之曰：「兵已行矣，可以言子之所爲。吾子何以教我？」粵曰：「今聞朝廷使程千里統衆十萬，自太行東下，將出嚙口爲賊所扼，兵不得前。今若先伐魏都，斬其守將，袁知泰、太守司馬垂使爲西南主，分兵開嚙口之路，出千里之兵，因討汲鄴以北，至於幽陵、平原、清河，合同志十萬之衆，徇洛陽，分兵而制其衝計。王師不下二十萬，河南義兵西向者亦不下十萬，公但當表朝廷堅壁，無與挑戰，不數十日，賊必潰而相圖矣。」公然之，乃移檄清河等郡，遣其大將李擇交、副將平原縣令范東、馥裨將和琳、徐浩等進兵，與清河四千人合勢，而博平以千人來，三郡之師屯於博平。去堂邑縣西南十里，賊帥袁知泰遣其將白嗣深、乙舒蒙等以二萬人來拒戰。六月癸未朔，賊大敗，斬首萬餘級，軍聲大振。知泰走汲郡，史思明圍饒陽，遣游奕兵絕平原，救軍公懼，不敵，以書招賀蘭進明，將步騎五千渡河，公陳兵逆之，相揖哭於馬上，哀動行伍。進明屯平原城南，公每事咨之。由是軍權稍移於進明，公不以爲嫌，復以堂邑之功讓之。進明奏其狀，取捨任意，敕加進明河北招討使，擇交等微進資級。清河博平有功者，皆不錄。進明攻信都久之，不克，參軍第五琦勸進明厚以金帛募勇士，乃克之。會平盧將劉正臣以漁陽歸，公欲堅其意，遣賈載越海，遺軍資十餘萬以子頗爲質。頗甫十歲，軍中固請留之，不從。時范陽節度使李光弼合汾陽王郭子儀之兵，敗思明於嘉山平原之圍，遂解。

十五載丙申四十八歲正月，加戶部侍郎兼平原郡太守。三月，兼河北招討採訪使。七月，肅宗卽位，靈武改元至德，有賀卽位表，初公聞李光弼下井陘，卽斂兵還平原，及聞郭李西入，始復區處河北軍事。數遣使張雲子、主簿李銑等以蠟丸裹書，由閑道上表陳事，授工部尚書兼御史大夫。又加銀青光祿大夫，仍以河北招討

探訪處置使守平原時肅宗所致赦書亦以蠟九礪公公頒下諸郡又遣人頒於河南江淮由是諸道始知上卽位於靈武徇國之心益堅劉正臣等尅期南來行已有日祿山乘虛遣史思明尹子奇急攻河北諸郡公使和琳以一萬二千八人馬百匹救河間琳爲子奇所擒河間饒陽景城樂安遂相次陷沒獨平原博平淸河三郡城守十月祿山又遣騎將康沒野波攻平原公覺之兵馬旣盡人心危盪不可復振公乃棄郡渡河沒野波緩策不追及聞渡河乃佯爲追躡是以得脫於難歷江淮荆襄與各道探訪使計會兵馬竟不可得而平原等郡遂盡陷於賊是載公次襄城時節度使魯炅保南陽爲賊所圍城中食盡中使曹日昇來宣慰路絕不得入請單騎入致命襄陽太守魏仲犀不可公曰曹使旣果決不顧萬死之地何得沮之縱爲賊所獲是亡一使者苟得入城則萬人之心固矣公何愛焉仲犀乃以騎助之賊不敢逼日昇旣入城衆皆踴躍至德二載丁酉四十九歲二月帝至鳳翔召公赴行在四月公朝鳳翔行至武當郡奉詔除憲部尙書（憲部卽刑部改名）有讓表六月加御史大夫有謝表（留譜云新書行狀月日不同今從家譜）八月弟允臧以監察御史遷殿中侍御史公上表謝時仲兄允南遷司膳郎中奉詔給驛召至鳳翔與公相見當代榮之中書舍人崔漪帶酒容入朝公劾之貶右庶子又劾諫議大夫李何忌在臥不肅且彈其不孝宰相房瑄黨何忌遽託以酒醉入朝貶爲西平郡司馬十月元帥廣平王（卽代宗）領朔方蕃漢兵號二十萬來收長安出辭之日百僚致謁於朝堂百僚拜王答拜辭亦如之王當闕不乘馬步出木馬門而後乘管崇嗣爲王都盧侯先王上馬公進狀彈之肅宗曰朕兒子每出諄諄教誡之故不敢失禮崇嗣老將有足疾姑優容之卿勿復言乃以奏狀還公肅宗將還西京遣左司郎中李巽先行陳告宗廟之禮有司署祝文稱嗣皇帝公謂禮儀使崔器曰上皇在蜀可乎器遽奏改之中旨宣勞以爲名儒深達禮體時太廟爲賊所毀公奏曰春秋時新宮災魯成公三日哭今太廟旣爲賊毀請築壇於野皇帝東向哭然後遣使竟不能從（肅宗紀十月

丁卯上入長安九廟爲賊所焚上素服哭於廟三日據此則公之奏固已酌而從之矣舊書本傳與紀異）公扈從還京時允南遷司封郎中允臧爲殿中公爲尙書兄弟三人同時臺省公於軍國之事知無不言爲宰相所忌（是月宰相爲崔圓李麟苗晉卿三人）十二月出爲同州刺史有謝表（是載十二月始復郡太守爲州刺史十一月尙無同州刺史之稱故新書本傳改爲馮翊太守案公集謝表亦稱同州刺史與舊書合則公之到同州任當是十二月事）道過郃陽有烈士左伯桃墓詩（詩佚）

三載戊戌五十歲二月肅宗改元乾元三月轉蒲州刺史充本州防禦使有謝上表封丹陽縣開國侯（舊書本傳無丹陽之封新書作丹陽縣子行狀作丹陽縣開國子）案「公書祭姪季明文及放生池表皆署丹陽縣開國侯攷職官志上州刺史爵開國侯蒲上州也不應封子陽作楊侯作子皆史誤也）四月贈祖昭甫華州刺史公嘗手書其告有謝贈祖官表五月贈杲卿太子太保杲卿被害時張通幽譖於楊國忠故不加贈至是公表其枉諡曰忠節公與兄國子司業允南表謝九月書自撰祭姪季明文有草稿存十月戊申赴蒲州辛亥過華陰題名金天王廟（金天王華嶽神也開元元年十月封題名刻在周天和碑側）公遣從子泉明至河北訪求血屬初李光弼郭子儀收復常山出杲卿袁履謙及將吏等妻女數百人於獄轉徙賊中窮窘無告泉明悉以歸蒲州公贍給久之資送歸里泉明又以公命購其父杲卿尸於河北弟季明尸於洛陽杲卿失一足季明得其首公以杲卿尸與張湊所歸髮葬於長安而以季明祔焉公爲御史唐明誣劾貶饒州刺史道過東京作祭伯父豪州刺史元孫文（元孫墓在東京鵠店東北高村原）

乾元二年己亥五十一歲公在饒州民苦盜公計擒首惡磔諸市四境肅然有顏司徒碑銘六月拜昇州刺史（江寧郡以元年改置昇州）充浙江西道節度使兼江寧軍使有謝表擢權臯爲行軍司馬（臯德權之子）是年有與蔣明遠帖李侍御寫眞贊有天下放生池碑銘

三年庚子五十二歲時揚州長史劉展將反公豫飭戰備都統李垺以爲生事非短之（明年十一月展果舉兵反垺與展戰於淮上敗績）二月以杭州刺史侯令儀代爲昇州刺史召公入朝爲刑部侍郎（舊書本傳作刑部尚書今從新書）閏四月肅宗改元上元公作朝議大夫徐秀神道碑七月作乞御書天下放生池碑額表八月宰相李輔國矯詔遷元宗居西宮公乃首率百僚上表請問起居輔國惡之又爲御史中丞敬羽所誣貶蓬州長史公由嘉陵路出閬州新政縣作鮮于氏離堆記（在今四川南部縣）

上元二年辛丑五十三歲是年九月去年號稱元年以十一月爲首歲公在蓬州救災恤惠民頌其德

元年壬寅五十四歲是年復以建巳爲四月改元寶應閏四月代宗卽位五月拜公利州刺史屬羌賊圍州城不得入詔赴上都七月以仲兄國子司業允南官贈父惟貞祕書少監母殷氏蘭陵郡太夫人二告皆公自書有謝表（案肅宗以是年四月丁卯崩少監告身下於七月二十七日謝表批答當是代宗家廟碑作肅宗蓋奉制在四月以前至七月始下告耳）十一月允南卒公爲撰神道碑十二月戶部侍郎劉晏以公文學正直舉以自代詔從之以晏爲國子祭酒以公爲戶部侍郎有謝表

寶應二年癸卯五十五歲三月改吏部侍郎（舊書本傳作戶部新書作吏部據放生池碑陰記蓋由戶部轉吏部也）加銀青光祿大夫有謝表七月代宗改元廣德八月荆南節度使李峴入爲宗正卿拜公江陵尹兼御史大夫充荆南節度觀察處置使有謝表舉壽安尉殷寅爲推官未行以衛伯玉代之除公尚書右丞（舊書本傳作左丞從新書）十月吐蕃犯京畿公扈從至陝州十二月車駕將還京師公請先謁五陵九廟而後還宮宰相元載曰所見雖美其如不合事宜何公怒前曰用捨在相公耳言者何罪朝廷之事豈堪相公再破壞邪載深銜之有工部尚書臧懷恪神道碑

二年甲辰五十六歲元年八月河北副元帥僕固懷恩拒命於汾州公請奉詔召之是年正月癸未改檢校刑部

尙書兼御史大夫充朔方行營汾晉等六州宣慰使未行公曰臣往請行者時也今方受命事無益矣上問其故對曰懷恩阻兵是其反側明矣頃陛下避狄於陝臣方責以春秋之義云寡君蒙塵於郊敢不恭問官守當是時也懷恩來朝以助討賊則其辭順今陛下攘去犬戎卽宮京邑懷恩進不勤王退不釋衆其辭曲必不來矣且明懷恩反者獨河東節度辛雲京澤潞節度李抱玉及中官駱奉先魚朝恩四人耳自外朝臣咸言其枉然懷恩將士皆郭子儀部曲信結其心陛下何不以子儀代之喻以禍福必相率而歸耳上從之留公知省事二月有與李太保帖三月伯父元孫贈祕書監公表謝是月晉封魯郡開國公食邑三千戶八月作和政公主神道碑（公主肅宗女降河東柳潭）十一月朝士以汾陽王郭子儀及其子先鋒晞破土蕃歸因爲興道之會尙書左僕射郭英乂詔事軍容使魚朝恩擠八座尙書坐其下公移書糾之有草稿存是月作伯父元孫神道碑作贈太保李光弼神道碑（碑爲張少悌書在陝西富平縣）書自撰贈太保郭敬之家廟碑（敬之子儀之父在陝西布政司）又有與李太保帖是冬兄幼輿卒於江陵

永泰元年乙巳五十七歲八月作刑部侍郎孫逖文集序作左金吾衛大將軍康阿義屈達千神道碑十月有與李太保帖

二年丙午五十八歲公在刑部時元載引用私黨懼朝士論奏其短乃請百官凡欲論事皆先白長官長官白宰相然後上聞公上疏切諫中人爭寫內本布於外二月攝祭太廟以祭器不修言於朝元載坐以誹謗貶硤州別駕書硤州帖又有廟享議朝會有故去樂議三月移貶吉州司馬道出潯陽書舊作左伯桃墓詩於蒲塘客舍有蒲塘辨六月書東林西林二寺題名十一月代宗改元大歷

大歷二年丁未五十九歲在吉州著廬陵集十卷正月書自撰京兆尹鮮于向神道碑十月書祖關二大字於靖居寺有靖居寺題名書守政帖